

MALAYSIA
DEWAN RAKYAT
ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov.my>

HARI SELASA, 28 MAC 2017, PUKUL 10.00 PAGI

Bil. 7

WAKTU PERTANYAAN-PERTANYAAN MENTERI

1. PR-1351-MQT0058
Dato' Haji Abdul Rahman Bin Mohamad [Lipis] minta **PERDANA MENTERI** menyatakan sebagaimana kita tahu, Angkatan Pertahanan Awam Malaysia (APM) bersedia membantu pejabat-pejabat hutan negeri untuk menguatkuasakan akta perhutanan negeri daripada dicerobohi oleh peneroka-peneroka hutan. Jadi, bagaimana perkara ini boleh dilaksanakan sedangkan kuasa akta tersebut terletak di bawah bidang kuasa negeri-negeri.

2. PR-1351-MQT0061
Puan Nurul Izzah Binti Anwar [Lembah Pantai] minta **PERDANA MENTERI** menyatakan perincian struktur penetapan tambang MRT serta mekanisme mencapai keseimbangan antara menjamin harga pengangkutan awam berpatutan dan mendapatkan kembali pelaburan dalam semakan tarif berjadual.

3. PR-1351-MQT0060
Dato' Dr. Noraini Binti Ahmad [Parit Sulong] minta **MENTERI PENDIDIKAN** menyatakan menerusi hasil keputusan Sijil Pelajaran Malaysia (SPM 2016) yang diumumkan baru-baru ini, apakah prestasi pelajar terkini dalam mata pelajaran Matematik yang dikatakan kurang memuaskan dan apakah langkah pragmatik yang akan diambil untuk menangani perkara ini.

MALAYSIA
DEWAN RAKYAT
ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov.my>

HARI SELASA, 28 MAC 2017, PUKUL 10.00 PAGI

Bil. 14

WAKTU PERTANYAAN-PERTANYAAN MENTERI

PERTANYAAN-PERTANYAAN BAGI JAWAB LISAN

1. PR-1351-L00205
Datuk Joseph Salang Gandum [Julau] minta **MENTERI KERJA RAYA** menyatakan secara terperinci penyertaan kontraktor Bumiputera dalam pembinaan Lebuhraya Pan Borneo.
2. PR-1351-L00418
Tuan Zairil Khir Johari [Bukit Bendera] minta **MENTERI KEWANGAN** menyatakan sama ada Kerajaan boleh mempertimbangkan pengecualian duti bagi pengimportan peralatan sukan, khususnya peralatan berteknologi tinggi, bagi menggalakkan pembangunan sukan ke arah tahap yang lebih tinggi.
3. PR-1351-L00609
Dato' Sri Hasan Bin Malek [Kuala Pilah] minta **MENTERI KEMAJUAN LUAR BANDAR DAN WILAYAH** menyatakan adakah pihak Kementerian bercadang untuk mengkaji semula syarat-syarat kelayakan pemohon pinjaman pendidikan MARA memandangkan kadar kos sara hidup yang meningkat di mana keluarga berpendapatan menengah tinggi dan tinggal di bandar juga terkesan bagi memastikan generasi pemimpin akan datang yang berilmu.
4. PR-1351-L00311
Dato' Takiyuddin Bin Hassan [Kota Bharu] minta **MENTERI PENDIDIKAN TINGGI** menyatakan berapa buah IPTA di Malaysia yang mana Ijazah Sarjana Muda Undang-Undang yang ditawarkan belum lagi diiktiraf oleh Kementerian dan pihak-pihak berkaitan untuk graduannya menjadi seorang peguam.

5. PR-1351-L00188
Datuk Dr. Makin @ Marcus Mojigoh [Putatan] minta **PERDANA MENTERI** menyatakan :-
 - (a) jumlah perbelanjaan yang telah dibelanjakan oleh Kerajaan bagi membantu mangsa banjir di seluruh negara untuk tempoh lima (5) tahun yang lalu, mengikut pecahan negeri-negeri; dan
 - (b) jumlah perbelanjaan yang ditanggung oleh Kerajaan bagi membaik pulih harta Kerajaan serta kemudahan awam bagi tempoh masa yang sama akibat banjir.
6. PR-1351-L01149
Tuan Ahmad Marzuk Bin Shaary [Bachok] minta **PERDANA MENTERI** menyatakan status pemberian pampasan kepada jemaah haji mangsa tragedi kren runtuh di Mekah tahun 2015.
7. PR-1351-L01326
Dato' Haji Mohd Fasih Bin Mohd Fakeh [Sabak Bernam] minta **MENTERI KESIHATAN** menyatakan sejauh manakah kejayaan Kempen Anti Merokok bagi mengurangkan amalan merokok di kalangan remaja dan belia berumur 15 hingga 40 tahun dan nyatakan langkah-langkah Kerajaan bagi mencapai negara bebas amalan merokok menjelang tahun 2045.
8. PR-1351-L01312
Dato' Abdullah Sani Bin Abdul Hamid [Kuala Langat] minta **MENTERI SUMBER MANUSIA** menyatakan langkah-langkah Kerajaan sekiranya syarikat luar mengambilalih syarikat tempatan dan mereka tidak mahu mengambil pekerja tempatan.
9. PR-1351-L01350
Tuan Khoo Soo Seang [Tebrau] minta **MENTERI PENDIDIKAN** menyatakan adakah unsur kebajikan haiwan dimasukkan ke dalam sukatan pendidikan bagi meningkatkan kesedaran orang muda terhadap kepentingan memelihara haiwan seperti strategi yang dipakai oleh Australia.
10. PR-1351-L01041
Tuan Er Teck Hwa [Bakri] minta **MENTERI SAINS, TEKNOLOGI DAN INOVASI** menyatakan jumlah geran penyelidikan yang telah diluluskan oleh MOSTI dan berapa jumlah penyelidikan tajaan MOSTI yang telah dipatenkan.
11. PR-1351-L00629
Datuk Liang Teck Meng [Simpang Renggam] minta **MENTERI SUMBER MANUSIA** menyatakan apakah suntikan dan perancangan Kementerian sebagai langkah untuk tingkatkan sasaran kemahiran tenaga kerja mahir seperti yang disasarkan sebanyak 35 peratus ke arah negara maju dan berpendapatan tinggi.

12. PR-1351-L01033
Puan Hajah Siti Zailah Binti Mohd Yusoff [Rantau Panjang] minta **MENTERI KEWANGAN** menyatakan jumlah hutang negara terkini dan usaha-usaha untuk mengurangkan beban hutang negara ini.
13. PR-1351-L01119
Dato' Sri Ikmal Hisham Bin Abdul Aziz [Tanah Merah] minta **MENTERI KEWANGAN** menyatakan berapa ramaikah penerima BR1M setakat ini berdasarkan negeri-negeri.
14. PR-1351-L00803
Tuan Ignatius Dorell Leiking [Penampang] minta **MENTERI KEWANGAN** menyatakan secara terperinci berapa jumlah Cukai Goods and Services Tax (GST) yang telah dikutip setiap bulan daripada Sabah dan juga Sarawak sejak pelaksanaan cukai GST dan adakah GST ini telah membawa manfaat yang baik kepada masyarakat Sabah dan Sarawak keseluruhannya.
15. PR-1351-L00568
Dato' Abd Aziz Bin Sheikh Fadzir [Kulim Bandar Baharu] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan apakah kaedah yang diguna pakai oleh Kerajaan dalam menentukan harga siling rumah terutamanya kepada pemaju-pemaju perumahan bagi membolehkan rakyat mampu untuk membeli dan memiliki rumah.
16. PR-1351-L01086
Tuan Teo Kok Seong [Rasah] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan :-
 - (a) apakah tindakan yang telah diambil oleh Kerajaan dan agensi pusat terhadap insiden sebuah rumah dihempap papan gergasi di Kampung Pelegong Labu yang terletak di tepi Lebuhraya Utara Selatan ; dan
 - (b) bagaimanakah Kerajaan pusat dan agensi yang terlibat dapat memastikan perkara yang seperti di atas tidak akan berulang lagi.
17. PR-1351-L00032
Dato' Sri Bung Moktar Bin Radin [Kinabatangan] minta **MENTERI PERTANIAN DAN INDUSTRI ASAS TANI** menyatakan tentang kesan negatif dan langkah-langkah yang diambil oleh Kerajaan dalam membantu ekonomi kaum nelayan berikutan Perintah Larangan ke Laut di sebelah malam yang masih berkuatkuasa di Pantai Timur Sabah khususnya di daerah Kinabatangan.
18. PR-1351-L00997
Tuan Wong Ling Bui [Sarikei] minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan apakah langkah-langkah yang akan diambil untuk memastikan 1kg minyak masak yang bersubsidi cukup untuk golongan berpendapatan rendah. (mereka yang tidak beli minyak masak yang tidak bersubsidi).

19. PR-1351-L00484
Dr. Mansor Bin Abd Rahman [Sik] minta **MENTERI PERUSAHAAN PERLADANGAN DAN KOMODITI** menyatakan apakah faktor yang menyebabkan harga getah meningkat dengan mendadak dari RM1.80 ke RM4.50 dan adakah harga ini boleh dikekalkan.
20. PR-1351-L00883
Puan Nurul Izzah Binti Anwar [Lembah Pantai] minta **MENTERI DALAM NEGERI** menyatakan :-
- (a) langkah-langkah yang diambil terhadap orang asing yang telah ditahan di bawah Akta Kesalahan Keselamatan (Langkah-langkah Khas) 2012 atas dakwaan mencetuskan keganasan ; dan
 - (b) adakah orang asing juga menyertai program deradikalisasi, ataupun adakah mereka terus ditahan dan dihantar kembali ke negara asal.
21. PR-1351-L00088
Dato' Haji Mohd Zaim Bin Abu Hasan [Parit] minta **MENTERI PERTANIAN DAN INDUSTRI ASAS TANI** menyatakan bilakah permohonan untuk memasukkan kawasan bendang seluas 3,000 ekar dalam kawasan Parlimen Parit dapat dipertimbangkan untuk dimasukkan ke dalam skim Perairan Seberang Perak [IADA].
22. PR-1351-L01117
Tuan Gooi Hsiao- Leung [Alor Setar] minta **MENTERI PERTANIAN DAN INDUSTRI ASAS TANI** menyatakan kenapa kerajaan sampai hari ini, enggan menubuhkan semula Lembaga Padi Negara untuk mengawal selia industri padi beras negara sedangkan BERNAS sudah menjadi sebuah syarikat milikan swasta sepenuhnya yang berpandu kepada keuntungan.
23. PR-1351-L00075
Datuk Noor Ehsanuddin Bin Mohd Harun Narrashid [Kota Tinggi] minta **MENTERI PELANCONGAN DAN KEBUDAYAAN** menyatakan adakah Kementerian terutamanya Tourism Malaysia bercadang untuk memperkasakan penggunaan iklan digital bagi meningkatkan usaha-usaha dalam membuat promosi perlancongan bagi menarik minat pelancong domestik dan juga antarabangsa.
24. PR-1351-L00024
Datuk Dr. Ewon Bin Ebin [Ranau] minta **PERDANA MENTERI** menyatakan :-
- (a) berapakah jumlah kerugian yang ditanggung oleh FELDA (Lembaga Kemajuan Tanah Persekutuan) khususnya, kerugian "Pelaburan Gagal" yang dibuat oleh pihak pengurusan Felda; dan

- (b) apakah tindakan membaik pulih yang telah diambil oleh pihak pengurusan FELDA untuk mengatasi masalah ini dan langkah-langkah pencegahan agar perkara ini tidak berulang lagi.
25. PR-1351-L01137
Tuan Ng Wei Aik [Tanjong] minta **PERDANA MENTERI** menyatakan sama ada kelulusan boleh diberikan kepada Kerajaan Negeri Pulau Pinang untuk melaksanakan projek landasan LRT/Monorel bagi Negeri Pulau Pinang dengan dana modal tersendiri walaupun Kerajaan Persekutuan tidak dapat melaksanakannya sejak tahun 2006.
26. PR-1351-L00683
Tuan Lim Guan Eng [Bagan] minta **MENTERI PENGANGKUTAN** menyatakan kadar pertumbuhan untuk semua lapangan terbang di Malaysia, bilangannya berbanding dengan kapasitinya. Bilakah pembesaran Lapangan Terbang Antarabangsa Pulau Pinang yang telah pun mencapai kapasiti maksimum akan dijalankan. Perincian kos penyelenggaraan, pulangan keuntungan dan kemasukan penumpang lapangan terbang lain dalam negara sejak 2008.
27. PR-1351-L00245
Dato' Sri Hasan Bin Arifin [Rompin] minta **MENTERI KEWANGAN** menyatakan bilakah Kumpulan Wang Persaraan (Diperbadankan) KWAP dijangka akan mengambil alih tanggungjawab menyediakan dana untuk pembayaran pencen kakitangan awam dari Kerajaan dan bagaimanakah prestasi pelaburan KWAP sejak lima tahun kebelakangan ini.
28. PR-1351-L00434
Tuan Budiman Bin Mohd Zohdi [Sungai Besar] minta **MENTERI PELANCONGAN DAN KEBUDAYAAN** menyatakan sejauh manakah keberkesanan program Hotel Assist On The Go (HAOTG) dalam menyediakan tenaga kerja secara separuh masa untuk industri perhotelan dan adakah program ini akan diperluaskan bagi membangunkan industri inap desa di kawasan luar bandar.
29. PR-1351-L01195
Dato' Seri Mohamed Azmin Bin Ali [Gombak] minta **PERDANA MENTERI** menyatakan mengapakah FELDA membayar jumlah premium yang begitu tinggi untuk memiliki 37% ekuiti PT Eagle High Plantation.
30. PR-1351-L00067
Datuk Sapawi Bin Haji Amat Wasali @ Ahmad [Sipitang] minta **MENTERI DALAM NEGERI** menyatakan tindakan yang dikenakan ke atas kes-kes penipuan dalam talian (online) yang meningkat kepada 3,921 kes tahun 2016 berbanding 3,257 kes pada tahun 2015. Apakah bentuk penipuan yang lazim dilakukan, dan apakah hukuman boleh dikenakan ke atas penjenayah siber ini.

31. PR-1351-L00617
Tuan M. Kulasegaran [Ipoh Barat] minta **MENTERI DALAM NEGERI** menyatakan :-
- (a) jumlah kematian tahanan dalam penjagaan polis sejak tahun 2000 dan sebab-sebab kematian dan adakah mana-mana pihak pegawai polis yang dikenakan tindakan tatatertib akibat kematian di bawah tahanan polis; dan
 - (b) berapakah jumlah banduan tercedera semasa ditahan di penjara dan lokap polis.
32. PR-1351-L00843
Dato' Sri Douglas Uggah Embas [Betong] minta **MENTERI BELIA DAN SUKAN** menyatakan jumlah belia luar bandar yang tidak berada dalam 'Education, Employment dan Training' (NEET) kini serta punca masalah tersebut di peringkat Nasional dan di peringkat Sarawak.
33. PR-1351-L01171
Puan Alice Lau Kiong Yieng [Lanang] minta **MENTERI DALAM NEGERI** menyatakan bilangan Pusat Pemulihan Dadah di Malaysia (termasuk Pusat Pemulihan Dadah Swasta) dan jumlah klien yang ada di setiap Pusat Pemulihan Dadah serta bagaimana orang awam dapat memohon masuk ke Pusat Pemulihan Dadah.
34. PR-1351-L00016
Dato' Seri Haji Ahmad Husni Bin Mohamad Hanadzlah [Tambun] minta **PERDANA MENTERI** menyatakan apakah perpaduan sejati telah wujud di kalangan rakyat perbagai kaum di negara ini demi masa depan negara kita. Apakah indikator-indikatornya.
35. PR-1351-L00373
Laksamana Pertama Haji Mohamad Imran Bin Abd Hamid (B) [Lumut] minta **MENTERI PERTAHANAN** menyatakan adakah Kementerian akan mengubah keputusan supaya kesemua empat (4) buah LMS yang dirancang dibina di Negara China bagi mengelak kelewatan dan mendedahkan warga Malaysia sebagai pengguna dan pakar penyelenggara sahaja sebagaimana yang pernah dilakukan kepada pembinaan 4XMCMW di Itali, 4X2 FACM di Perancis begitu juga dengan lebih 12xPC yang dibina di United Kingdom.
36. PR-1351-L00460
Datuk Raime Bin Unggi [Tenom] minta **MENTERI KOMUNIKASI DAN MULTIMEDIA** menyatakan jumlah menara selular kecil yang boleh memberi liputan dalam radius seluas tiga hingga lima kilometer dengan capaian sekurang-kurangnya 2G dan 3G di seluruh negara terutama di Sabah.

37. PR-1351-L00259
Tuan Sim Tong Him [Kota Melaka] minta **MENTERI SUMBER ASLI DAN ALAM SEKITAR** menyatakan tentang kuasa dan tanggungjawab setiap Jabatan Perhutanan Negeri :-
- (a) adakah ia perlu mendapat kelulusan dari Kementerian untuk menawarkan projek Tanaman Pelbagai Spesis ; dan
 - (b) adakah projek Tanaman Pelbagai Spesis ini juga terlibat dengan pembalakan di tapak berkenaan.
38. PR-1351-L00158
Dr. Michael Jeyakumar Devaraj [Sungai Siput] minta **MENTERI PERTANIAN DAN INDUSTRI ASAS TANI** menyatakan bilangan lesen menangkap ikan yang masih aktif di kawasan perairan Pantai Timur Semenanjung Malaysia dengan pecahan lesen A, B, C dan C2. Adakah benar adanya beberapa kapal tunda asing yang telah diluluskan lesen menangkap ikan di perairan Malaysia.
39. PR-1351-L00593
Tuan Nga Kor Ming [Taiping] minta **MENTERI PERTANIAN DAN INDUSTRI ASAS TANI** menyatakan apakah tindakan dan rancangan segera Kementerian untuk meningkatkan food sekuriti dan hasil produk makanan negara supaya negara kita tidak terlalu bergantung kepada makanan import dari negara asing yang kini mencecah paras RM32.1 bilion.
40. PR-1351-L00286
Ir. Shaharuddin Bin Ismail [Kangar] minta **MENTERI PELANCONGAN DAN KEBUDAYAAN** menyatakan apakah perancangan Kementerian dalam meningkatkan daya saing sektor pelancongan seperti mewujudkan inisiatif tambahan kepada agensi-agensi pelancongan dan apakah tahap pembangunan yang dirangka oleh Kementerian dalam meningkatkan lagi promosi destinasi pelancongan di Negeri Perlis yang semakin suram.
41. PR-1351-L00762
Tuan Nik Mohamad Abduh Bin Nik Abdul Aziz [Pasir Mas] minta **PERDANA MENTERI** menyatakan langkah penguatkuasaan yang diambil oleh SPAD bagi mengatasi tragedi nahas bas ekspres daripada berulang.
42. PR-1351-L00264
Datuk Dr. Haji. Abd. Latiff Bin Ahmad [Mersing] minta **MENTERI KEWANGAN** menyatakan berapakah tangkapan serta dakwaan dibuat oleh Jabatan Kastam Diraja sejak GST diperkenalkan bagi memastikan kutipan GST berjalan lancar.

43. PR-1351-L00599
Dato' Mohd Ariff Sabri Bin Abdul Aziz [Raub] minta **PERDANA MENTERI** menyatakan setelah perlantikan pengerusi Felda yang baru dilakukan :-
- (a) apakah asset dan perniagaan yang telah dijual ; dan
 - (b) berapa nilai setiap satu penjualan tersebut.
44. PR-1351-L00365
Datuk Aaron Ago Anak Dagang [Kanowit] minta **MENTERI PERTANIAN DAN INDUSTRI ASAS TANI** menyatakan apakah dasar dan insentif Kerajaan terhadap perusahaan burung walit di Malaysia. Berapakah jumlah petani yang sudah menceburkan diri dalam bisness burung walit ini.
45. PR-1351-L00878
Dato' Seri Haji Abdul Hadi Bin Awang [Marang] minta **MENTERI KEWANGAN** menyatakan bagaimanakah cara dan formula pengiraan harga bahan api yang dibuat oleh Kerajaan.
46. PR-1351-L01014
Dato' Dr. Tan Kee Kwong [Wangsa Maju] minta **PERDANA MENTERI** menyatakan apakah tindakan yang diambil untuk menyelamatkan FELDA.
47. PR-1351-L00202
Tuan Wong Tien Fatt @ Wong Nyuk Foh [Sandakan] minta **MENTERI PENGANGKUTAN** menyatakan kedudukan cadangan daripada Suruhanjaya Penerbangan Malaysia (MAVCOM) bahawa Lapangan Terbang Antarabangsa Kota Kinabalu dipindah ke tempat lain.
48. PR-1351-L00686
Tuan Jeff Ooi Chuan Aun [Jelutong] minta **MENTERI KEWANGAN** menyatakan perbezaan antara metodologi Automatic Pricing Mechanism (APM) yang diamalkan di Malaysia dengan Mean of Platts Singapore (MOPS) dalam pengiraan untuk menentukan harga bahan api di Malaysia.
49. PR-1351-L00863
Dr. Izani Bin Husin [Pengkalan Chepa] minta **MENTERI DALAM NEGERI** menyatakan statistik terkini penagih dadah mengikut pecahan jantina, umur dan bangsa.
50. PR-1351-L00233
Tuan William Leong Jee Keen [Selayang] minta **MENTERI PENGANGKUTAN** menyatakan langkah-langkah yang diambil untuk memastikan kelayaklayan dan keselamatan kapal penumpang khususnya bagi pelancong-pelancong, berikutan tragedi katamaran Pulau Mengakum dan bot Tawau terbalik pada 28 Januari 2017 dan 7 Februari 2017.
51. PR-1351-L00767
Tuan Haji Wan Hassan Bin Mohd Ramli [Dungun] minta **PERDANA MENTERI** menyatakan apakah rasional FELDA melaksanakan penjualan aset-aset yang dimilikinya di luar negara.

52. PR-1351-L00696
Datuk Mohd Idris Bin Jusi [Batu Pahat] minta **MENTERI PELANCONGAN DAN KEBUDAYAAN** menyatakan produk-produk "Pelancongan Islam", usaha-usaha menambah dan mempromosinya bagi menarik lebih ramai pelancong daripada Asia Barat dan menghuraikan keberkesanan usaha-usaha tersebut.
53. PR-1351-L00967
Dato' Dr. Mujahid Bin Yusof Rawa [Parit Buntar] minta **MENTERI PERTANIAN DAN INDUSTRI ASAS TANI** menyatakan bagaimana kriteria pemutuan dibuat atas hasil padi yang membebankan para pesawah baru-baru ini.
54. PR-1351-L(5)01395
Tuan Hee Loy Sian [Petaling Jaya Selatan] minta **PERDANA MENTERI** menyatakan usaha Kerajaan untuk mendaftarkan sejumlah 4,060,339 warganegara yang layak mengundi untuk mendaftar sebagai pemilih.

[Pertanyaan di bawah PM.25(5)]

PADA PERMULAAN URUSAN MESYUARAT
MENGEMUKAKAN RANG UNDANG-UNDANG KERAJAAN
UNTUK BACAAN KALI YANG PERTAMA

1. Menteri Di Jabatan Perdana Menteri

- * Rang Undang-Undang Kesalahan-Kesalahan Seksual Terhadap Kanak-Kanak 2017

* Menandakan bahawa Rang Undang-undang ini akan dibawa pada semua peringkat di mesyuarat ini.

ATURAN URUSAN MESYUARAT DAN USUL-USUL

1. **Pertimbangan ke atas Rang Undang-undang Perbekalan Tambahan (2016) 2017 (D.R. 5/2017) dan Usul Anggaran Perbelanjaan Pembangunan Tambahan Pertama 2016 seperti berikut :-**

“Bahawa Dewan ini, mengikut subseksyen 4(3) Akta Kumpulan Wang Pembangunan 1966 [Akta 406], membuat ketetapan bahawa jumlah wang tambahan sebanyak sembilan ratus lapan puluh tujuh juta tujuh ratus enam puluh satu ribu satu ratus tujuh puluh empat ringgit (RM987,761,174) diperuntukkan daripada Kumpulan Wang Pembangunan bagi tahun kewangan 2016 bagi Maksud dan Butiran (Projek) seperti yang dinyatakan dalam ruang pertama dan kedua penyata Anggaran Perbelanjaan Pembangunan Tambahan Pertama 2016 yang dibentangkan sebagai Kertas Perintah 2 Tahun 2017 dan yang disenaraikan di sebelah Maksud dan Butiran (Projek) dalam ruang sembilan dan sepuluh penyata tersebut.”

Dalam Jawatankuasa Sebuah-buah Majlis (28 Mac, 2017)

- | | | | |
|----|----------------|---|-------------------------------|
| 2. | (D.R. 21/2016) | Rang Undang-undang Kebankrapan (Pindaan) 2016 | Bacaan Kali Yang Kedua |
| | | [Menteri di Jabatan Perdana Menteri] | |
| 3. | (D.R. 13/2016) | Rang Undang-undang Mahkamah (Kaedah-Kaedah Pemulaan Tindakan Sivill) 2016 | “ |
| | | [Menteri di Jabatan Perdana Menteri] | |
| 4. | (D.R. 4/2017) | Rang Undang-Undang Saraan Hakim (Pindaan) 2017 | “ |
| | | [Menteri di Jabatan Perdana Menteri] | |
| 5. | (D.R. 1/2017) | Rang Undang-Undang Timbang dan Sukat (Pindaan) 2017 | “ |
| | | [Menteri Perdagangan Dalam Negeri, Koperasi dan Kepenggunaan] | |
| 6. | (D.R. 3/2017) | Rang Undang-Undang Perdagangan Strategik (Pindaan) 2017 | “ |
| | | [Menteri Perdagangan Antarabangsa Dan Industri] | |

7. (D.R. 2/2017) Rang Undang-Undang Institusi Pendidikan Tinggi Swasta (Pindaan) 2017 “

[Menteri Pendidikan Tinggi]

8. (D.R. 25/2016) Rang Undang-undang Setem (Pindaan) 2016 “

[Menteri Kewangan]

9. (D.R. 20/2016) Rang Undang-undang Membaharui Undang-undang (Perkahwinan dan Perceraian) (Pindaan) 2016 “

[Menteri di Jabatan Perdana Menteri]

10. **Menteri Kewangan akan mencadangkan:-**

“Bahawa mengikut Seksyen 5, Akta Persatuan Pembangunan Antarabangsa 1960 (Akta 431), Dewan ini mengambil ketetapan bahawa sumbangan Malaysia sebanyak USD27,000,000.00 kepada Program Penambahan Dana Ke 18 Persatuan Pembangunan Antarabangsa (IDA) diluluskan”.

11. **Menteri Kewangan akan mencadangkan:-**

“Bahawa Dewan ini, mengikut peruntukan :

- (i) perenggan 4(b) Akta Pendanaan Kerajaan 1983 [Akta 275], mengambil ketetapan supaya Kerajaan memindahkan sebanyak RM20,500 juta wang terimaan Terbitan Pelaburan Kerajaan Malaysia (MGII) di bawah seksyen 3(1) Akta yang sama

ke Kumpulan Wang Pembangunan yang dinyatakan dalam Jadual Kedua Akta Tatacara Kewangan 1957 [Akta 61] bagi maksud Kumpulan Wang tersebut”.

12. **Dato’ Seri Abdul Hadi bin Awang [Marang] akan mencadangkan:-**

“Bahawa Dewan ini memberikan kebenaran menurut Peraturan Mesyuarat 49 (1) kepada Yang Berhormat Ahli bagi kawasan Marang untuk mencadangkan suatu Rang Undang-undang Ahli Persendirian bernama Rang Undang-undang Mahkamah Syariah (Bidang Kuasa Jenayah) (Pindaan) 2016 seperti berikut:-

Pindaan Seksyen 2

Akta Mahkamah Syariah (Bidang Kuasa Jenayah) 1965 [Akta 355] dipinda dalam proviso kepada seksyen 2 dengan menggantikan perkataan “***penjara selama tempoh melebihi tiga tahun atau denda melebihi lima ribu ringgit atau sebatan melebihi enam kali*** “ dengan perkataan “***penjara selama tempoh melebihi tiga puluh tahun atau denda melebihi satu ratus ribu ringgit atau sebatan satu ratus kali sebagaimana ditadbir selaras dengan tatacara jenayah Syariah***”.

[Menteri di Jabatan Perdana Menteri]

13. R-1351-U(27)002

Dr. Tan Seng Giaw [Kepong] akan mencadangkan :-

Bahawa Dewan ini membahaskan masalah akibat penarikan Amerika Syarikat daripada TPPA.

[Menteri Perdagangan Antarabangsa Dan Industri]

14. PR-1351-U(27)003

Datuk Dr. Makin @ Marcus Mojigoh [Putatan] akan mencadangkan :-

“Bahawa Dewan ini mengambil maklum bahawa, pertumbuhan penduduk di daerah Putatan adalah begitu mendadak sekali dan ditokok tambah dengan pembangunan infrastruktur yang rancak seiring dengan statusnya sebagai satu daripada daerah yang rancak membangun di negeri Sabah khasnya.

Dan mengambil maklum juga bahawa, dewasa ini, isu masalah sosial, keselamatan sosial serta ketenteraman sosial menjadi topik bualan harian di kalangan warga Putatan. Setiap hari ketiga-tiga topik ini akan kedengaran malah menjadi kegusaran bagi warga Putatan kerana kehadiran anggota keselamatan yang amat kurang disebabkan cadangan pewujudan dan pembinaan ibu pejabat polis daerah Putatan telah lama tertangguh.

Dan mengambil maklum juga bahawa ketika ini, isu masalah sosial, keselamatan sosial serta ketenteraman sosial di Putatan adalah di bawah pentadbiran Ibu Pejabat Polis Daerah Penampang serta sebahagiannya di bawah pentadbiran Ibu Pejabat Polis Daerah Kota Kinabalu.

Mengambil maklum juga bahawa untuk menangani masalah sosial, keselamatan sosial serta ketenteraman sosial di daerah Putatan, hanya sebuah balai polis yang dianggotai kurang daripada 22 anggota dengan kelengkapan yang serba kekurangan, terpaksa berhempas pulas untuk menjaga daerah Putatan dengan keluasan 30km persegi dan berkepadatan penduduk melebihi 100 ribu orang.

Dan mengambil maklum juga bahawa, apabila berlakunya sesuatu jenayah atau kecemasan, ada kalanya ketibaan anggota keselamatan itu agak lewat kerana jarak tempat kejadian dengan IPD Penampang atau IPD Kota Kinabalu agak jauh dan mengambil masa untuk tiba.

Maka, bagi menangani masalah ini, Dewan yang mulia ini hendaklah mengambil ketetapan bahawa Kerajaan haruslah dengan segera meluluskan penubuhan dan pembinaan IPD Putatan lengkap dengan perawatannya".

[Menteri Dalam Negeri]

15. PR-1351-U(27)004

Datuk Dr. Makin @ Marcus Mojigoh [Putatan] akan mencadangkan :-

"Bahawa Dewan ini mengambil maklum bahawa Perkara 11 Perlembagaan Persekutuan Malaysia memberikan semua rakyatnya kebebasan beragama.

Dan mengambil maklum juga bahawa Perkara 8 Perlembagaan Persekutuan Malaysia menjamin kesamarataan hak untuk warganya bagi menjalani kehidupan harian mereka.

Dan mengambil maklum juga bahawa, Malaysia sebagai negara peneraju gerakan kesederhanaan global di bawah pimpinan YAB. Perdana Menteri, telah berjaya memahat nama di persada antarabangsa di mana Malaysia menjadi model penerimaan kepelbagaian agama dan kaum sebagai sumber kekuatannya.

Dan mengambil maklum juga bahawa, konsep penerimaan kepelbagaian agama dan bangsa melalui Gagasan 1Malaysia adalah model yang terbaik dalam mewujudkan keharmonian, kemakmuran dan perpaduan di negara ini.

Dan mengambil maklum juga bahawa Kerajaan pimpinan YAB. Perdana Menteri berjanji melalui manifesto Barisan Nasional pada PRU ke-13, untuk menyediakan lebih banyak bantuan kewangan kepada institusi-institusi agama berdaftar dan rumah-rumah ibadat.

Dan mengambil maklum dan contoh, bahawa Kerajaan Negeri Sabah dan Sarawak juga telah menyediakan dana khas dalam bajet tahunan mereka bagi maksud bantuan kewangan kepada institusi-institusi agama berdaftar dan rumah-rumah ibadat di negeri Sabah dan Sarawak.

Maka, bagi memenuhi aspirasi di atas dan rakyat bukan Islam khususnya, Dewan yang mulia ini hendaklah mengambil ketetapan bahawa Kerajaan Malaysia hendaklah menyediakan satu jumlah khas (dana) dalam bajet tahunan negara, bagi aktiviti institusi-institusi agama berdaftar dan rumah-rumah ibadat (bukan Islam)."

[Perdana Menteri]

16. PR-1351-U(27)005

Datuk Dr. Makin @ Marcus Mojigoh [Putatan] akan mencadangkan :-

"Bahawa Dewan ini mengambil maklum bahawa, Orang Asli yang terdiri daripada suku Semang (Negrito), Senoi dan Proto Malay adalah Orang Asli yang tinggal di Semenanjung Malaysia dan juga merupakan penghuni tertua di Semenanjung Malaysia.

Dan mengambil maklum juga bahawa, walaupun Orang Asli adalah merupakan penduduk asli Semenanjung Malaysia dan disebut sebagai "Bumiputera", namun mereka tidak menikmati keistimewaan yang diberikan kepada kaum Melayu dan Bumiputera negeri Sabah dan Sarawak di mana mereka tidak diiktiraf sebagai Bumiputera di bawah Perkara 153 Perlembagaan Persekutuan Malaysia.

Dan mengambil maklum juga bahawa, walaupun Jabatan Hal Ehwal Orang Asli (JHEOA) telah ditubuhkan pada tahun 1954 dan pindaan ke atas beberapa akta, seperti Akta Orang Asli 1954 telah dibuat bagi membolehkan dan meningkatkan sosio budaya dan ekonomi Orang Asli, namun kedudukan mereka tidak banyak berubah disebabkan status kedudukan mereka dalam Perlembagaan negara adalah kurang jelas.

Dan mengambil maklum juga bahawa, sesuai dengan konsep 1Malaysia yang diterajui oleh YAB. Perdana Menteri, kedudukan Orang Asli di negara ini hendaklah diterima semua dan diberikan hak dan layanan sama rata.

Dan mengambil maklum juga bahawa Perkara 8 Perlembagaan Persekutuan Malaysia menjamin kesamarataan hak untuk warganya bagi menjalani kehidupan harian mereka, termasuklah kaum Orang Asli.

Maka, bagi menangani kepincangan ini, Dewan ini hendaklah mengambil ketetapan bahawa, Perkara 153 Perlembagaan Persekutuan Malaysia serta perkara-perkara yang berkaitan, hendaklah dipinda bagi membolehkan Orang Asli dikategorikan sebagai Bumiputera dan diberikan hak Bumiputera, seiringan dengan orang-orang Melayu dan kaum Bumiputera Sabah dan Sarawak."

[Perdana Menteri]

17. PR-1351-U(27)006

Datuk Dr. Makin @ Marcus Mojigoh [Putatan] akan mencadangkan :-

"Bahawa Dewan ini mengambil maklum bahawa, masalah setingan di bandar adalah masalah yang saban hari makin meningkat kerana migrasi dari luar bandar ke bandar, terutama sekali untuk tujuan mencari pekerjaan.

Dewan ini hendaklah juga mengambil maklum bahawa migran ekonomi yang berpindah daripada luar bandar ke bandar ini adalah dari golongan yang kurang berkemampuan/berpendapatan rendah dan mereka tidak mampu untuk membeli atau memiliki rumah-rumah yang dibina oleh pihak pemaju

atau PR1MA yang ada pada ketika ini, di mana kebanyakan mereka ini hanya mampu untuk membayar kadar sewaan di bawah RM350 sebulan.

Dan mengambil maklum juga bahawa, matlamat Kerajaan mensasarkan sifar setinggan terutama sekali di kawasan bandar adalah agak sukar untuk dicapai selagi masalah perumahan bagi migran yang dimaksudkan di atas tidak ditangani secara tuntas.

Dan mengambil maklum juga bahawa, Program Perumahan Rakyat (PPR) yang dahulunya untuk sewaan tanpa had masa dilihat sebagai satu langkah alternatif bagi mengatasi masalah setinggan di bandar dan sekali gus memberikan kumpulan sasar untuk menduduki rumah yang agak selesa. Tetapi malangnya, status PPR tersebut telah dipinda kepada status rumah transit untuk pendudukan untuk tempoh tidak melebihi lima (5) tahun.

Dan mengambil maklum juga bahawa Program Perumahan Rakyat atau PPR yang ada sekarang ini merupakan sumber alternatif bagi mengatasi masalah setinggan di bandar di mana rumah-rumah PPR ini diubah syarat daripada sewaan kepada sewa beli bagi membolehkan mereka yang dimaksudkan di atas untuk akhirnya memiliki rumah mereka sendiri.

Maka, bagi menangani masalah setinggan bandar dan kekurangan perumahan untuk golongan kurang mampu, Dewan ini hendaklah mengambil ketetapan bahawa Kerajaan hendaklah meminda syarat pendudukan rumah PPR di seluruh negara daripada bulanan kepada syarat sewa-beli.”

[Menteri Kesejahteraan Bandar, Perumahan Dan Kerajaan Tempatan]

18. PR-1351-U(27)007

Datuk Dr. Makin @ Marcus Mojigoh [Putatan] akan mencadangkan :-

“Bahawa Dewan ini mengambil maklum bahawa Chinese Independent School di Malaysia menjalankan taksiran peperiksaan persekolahan mereka melalui sijil yang dikenali sebagai Unified Examination Certificate (UEC) yang mana dibahagikan kepada tiga peringkat iaitu Unified Examination Certificate - Junior Middle (UEC-JML), Unified Examination Certificate Vocational (UEC-V) dan Unified Examination Certificate Senior Middle (UEC-SML).

Dan mengambil maklum juga bahawa, persijilan UEC telah pun diguna pakai dalam persekolahan oleh United Chinese School Committees Association of Malaysia sejak ianya diperkenalkan pada tahun 1975.

Dan mengambil maklum juga bahawa sijil UEC yang diperkenalkan oleh UCSCAM ini telah diiktiraf oleh universiti di serata negara seperti di United Kingdom, Amerika Syarikat, Taiwan, Hong Kong, China, Australia, Kanada, Singapura dan lain-lain negara.

Dan mengambil maklum juga bahawa malangnya, Kementerian Pendidikan dan Kementerian Pendidikan Tinggi Malaysia atau secara khususnya, Lembaga Akreditasi Negara tidak mengiktiraf sijil UEC ini terutama sekali bagi

kemasukan ke universiti awam Malaysia, walau pun National University of Singapore yang berkedudukan tempat keempat universiti terbaik di dunia mengiktiraf sijil UEC ini.

Dan mengambil maklum juga bahawa dengan ketiadaan pengiktirafan yang dimaksudkan di atas, negara Malaysia secara tidak langsung mengalami kerugian yang besar di mana pemegang sijil UEC ini terpaksa meneruskan pendidikan tinggi mereka di luar negara di mana aliran wang keluar daripada negara ini dan juga kecenderungan lepasan sijil UEC ini untuk terus bekerja di luar negara adalah tinggi, di mana dalam hal ini negara Malaysia akan kerugian "aliran keluar" tenaga mahir ke luar negara.

Maka, bagi menangani masalah ini, Dewan yang mulia ini hendaklah mengambil ketetapan bahawa Kerajaan haruslah dengan segera mengiktiraf Sijil Unified Examination Certificate bagi manfaat negara."

[Menteri Pendidikan]

19. PR-1351-U(27)008

Datuk Dr. Makin @ Marcus Mojigoh [Putatan] akan mencadangkan :-

"Bahawa Dewan ini mengambil maklum bahawa kesan pemanasan global dan perubahan cuaca kini menjadi topik perbualan harian di seluruh pelosok dunia di mana ianya bukan lagi satu fenomena tetapi telah menjadi realiti yang mana setiap warga dunia mempunyai tanggungjawab untuk sama-sama melaksanakan langkah-langkah mitigasi bagi mengurangkan impaknya ke atas kehidupan manusia.

Dan mengambil maklum juga bahawa salah satu penyebab utama kedua-dua masalah di atas adalah akibat daripada kesan penebangan pokok-pokok disebabkan aktiviti ekonomi seperti pembukaan ladang dan sebagainya.

Dan mengambil maklum juga bahawa pihak berkuasa tempatan berperanan untuk mengambil bahagian dalam usaha untuk langkah mitigasi bagi mengatasi kedua-dua masalah di atas walaupun dalam bentuk kecil, dengan menanam lebih banyak pokok-pokok di seluruh kawasan seliaan mereka.

Maka, bagi menangani masalah ini, Dewan yang mulia ini hendaklah mengambil ketetapan bahawa Kerajaan Malaysia hendaklah meminta pihak berkuasa tempatan untuk segera menanam lebih banyak pokok-pokok di kawasan di bawah seliaan mereka di samping memperbanyakkan kempen menanam pokok untuk menyemai budaya menanam pokok di kalangan rakyat setempat."

[Menteri Sumber Asli Dan Alam Sekitar]

20. PR-1351-U(27)009

Datuk Dr. Makin @ Marcus Mojigoh [Putatan] akan mencadangkan :-

“Bahawa Dewan ini mengambil maklum bahawa, bagi kawasan Dewan Undangan Negeri N.18 Petagas (Parlimen P.173 Putatan), hanya terdapat sebuah sekolah menengah sahaja iaitu Sekolah Menengah Kerajaan (SMK) Tansau, Putatan untuk menampung murid-murid keluaran lima (5) buah sekolah rendah yang terletak di kawasan yang sama.

Dan mengambil maklum juga bahawa, kerana kekurangan tempat di sekolah menengah, ramai murid daripada kawasan Dewan Undangan Negeri N.18 Petagas terpaksa meneruskan persekolahan menengah mereka di sekolah menengah di kawasan Dewan Undangan Negeri N.16 Luyang, N.17 Tanjong' Aru, N.19 Kapayan dan N.20 Moyog, di mana sekali gus meningkatkan kos persekolahan mereka daripada segi kos pengangkutan dan menyebabkan ketidakselesaan hidup rakyat.

Dan mengambil maklum juga bahawa cadangan pembinaan Sekolah Menengah Kerajaan (SMK) Petagas telah pun dirancang sejak Rancangan Malaysia Ke-Sembilan (RMK9) lagi dan disenaraikan semula dalam Rancangan Malaysia Ke-Sebelas (RMK11), namun sehingga kini belum terdapat sebarang keputusan tetap bagi permasalahan ini walau pun tapak bagi Sekolah Menengah Petagas serta infrastruktur asas seperti jalan raya telah pun tersedia.

Maka, bagi menangani masalah ini dan mendahulukan rakyat, Dewan yang mulia ini hendaklah mengambil ketetapan bahawa Sekolah Menengah Kerajaan (SMK) Petagas hendaklah dibina dan disiapkan dalam tempoh terdekat seperti yang telah dirancang terdahulu.”

[Menteri Pendidikan]

21. PR-1351-U(27)010

Dato' Kamarudin Bin Jaffar [Tumpat] akan mencadangkan :-

“Bahawa Dewan ini mengambil maklum akan cadangan untuk pembangunan semula kawasan Rumah Pangsa Sri Labuan dan pembangunan semula Zon 1 yang melibatkan Rumah Pangsa Sri Melaka, Sri Johor, Ikan Emas dan Sri Pulau Pinang di dalam kawasan Parlimen Bandar Tun Razak.

Dewan ini juga mengambil maklum kegelisahan majoriti penghuni di perumahan-perumahan yang terlibat akan masa depan mereka akibat daripada cadangan ini.

Maka Dewan ini mengambil kira suasana ini dan memutuskan bahawa segala cadangan pembangunan semula oleh Kementerian Wilayah Persekutuan di kawasan tersebut hendaklah mengambil kira perkara-perkara berikut:

- i . Mengadakan perbincangan dengan semua penghuni, iaitu pemilik dan penyewa selain daripada wakil-wakil blok dan persatuan-persatuan mereka;
- ii. Pihak DBKL mestilah dilibatkan dalam semua perbincangan dan keputusan, selain daripada pihak Kementerian;
- iii. Pemilihan pemaju mestilah ditentukan secara tender terbuka supaya penghuni dan pembeli mendapat tawaran terbaik; dan
- iv. Semua aspek pembangunan mestilah memberikan keselesaan kepada penghuni dengan mengambil kira ciri-ciri berikut:
 - a. Kepadatan setiap blok,
 - b. Keluasan unit
 - c. Kualiti pembinaan lif dan bahan binaan,
 - d . Kemampuan membayar yuran penyelenggaraan oleh pemilik selepas.

[Menteri Wilayah Persekutuan]

22. PR-1351-U(27)011

Dato' Kamarudin Bin Jaffar [Tumpat] akan mencadangkan :-

“Bahawa Dewan ini mengambil maklum dengan penuh kebimbangan akan pergolakan politik antarabangsa mutakhir ini yang mempamerkan satu suasana ketidakstabilan hubungan antarabangsa yang amat kritikal. Dewan juga memerhatikan dengan penuh kerisauan lagak politik Amerika Syarikat di bawah Presiden Trump, politik Eropah ekoran keputusan Brexit oleh Britain, politik Russia oleh Presiden Putin yang antara lain telah mengakibatkan Ukraine diceroboh dan penembakan pesawat MH17, dan lebih dekat lagi, politik Republik Rakyat China yang menuntut sebahagian Lautan China Selatan sebagai wilayahnya.

Maka, sebagai satu langkah peringkat negara dan serantau untuk menghadapi krisis ini, Dewan ini memutuskan untuk mempertegaskan dan menggerakkan semula dengan sungguh-sungguh dasar Asia Tenggara sebagai satu rantau yang aman, bebas dan berkecuali atau ZOPFAN yang telah dipersetujui dan dimeterai pada 27 November 1971 oleh Malaysia, Indonesia, Filipina, Thailand dan Singapura.”

[Menteri Luar Negeri]

23. PR-1351-U(27)012

Tuan Nga Kor Ming [Taiping] akan mencadangkan :-

“Bahawa Dewan yang mulia ini meluluskan satu ketetapan supaya Laporan Ketua Audit Negara berkenaan dengan isu 1MDB (1Malaysia Development Bhd) di bentang dan dikemukakan untuk perbahasan di Dewan Rakyat dengan kadar segera.”

[Perdana Menteri]

24. PR-1351-U(27)013

Tuan Nga Kor Ming [Taiping] akan mencadangkan :-

“Bahawa Dewan yang mulia ini meluluskan satu ketetapan supaya YAB. Perdana Menteri dan seluruh anggota Menteri Kabinet mengisytiharkan harta dan aset mereka kepada Dewan Rakyat tiap-tiap tahun pada bulan Disember”.

[Perdana Menteri]

25. PR-1351-U(27)014

Tuan Nga Kor Ming [Taiping] akan mencadangkan :-

“Bahawa Dewan yang mulia ini meluluskan satu ketetapan supaya mengesyorkan kepada KBDYMM Seri Paduka Baginda Yang Dipertuan Agong untuk menubuhkan satu Suruhanjaya Diraja supaya menyiasat dan mengemukakan laporan siasatan terhadap skandal kewangan 1MDB dengan kadar segera.”

[Perdana Menteri]

26. PR-1351-U(27)015

Tuan Nga Kor Ming [Taiping] akan mencadangkan :-

“Bahawa Dewan yang mulia ini meluluskan satu ketetapan selaras dengan titah Majlis Raja-Raja Melayu di mana Akta Majlis Keselamatan Negara 2016 di bentang dan dikaji semula di Dewan Rakyat dengan kadar segera.”

[Perdana Menteri]

27. PR-1351-U(27)016

Tuan Nga Kor Ming [Taiping] akan mencadangkan :-

“Bahawa Dewan yang mulia ini meluluskan satu ketetapan supaya Sijil Peperiksaan Unified Examination Certificate (UEC) yang telah mendapat pengiktirafan antarabangsa diberi pengiktirafan penuh oleh Kerajaan Malaysia.”

[Menteri Pendidikan]

28. PR-1351-U(27)017

Tuan Nga Kor Ming [Taiping] akan mencadangkan :-

“Bahawa Dewan yang mulia ini meluluskan satu ketetapan secara sebulat suara selaras dengan semangat Perlembagaan Persekutuan tahun 1957 dan prinsip "one man, one vote", mana-mana persempadanan semula kawasan pilihan raya jumlah bilangan pengundinya tidak boleh melebihi perbezaan 15% di antara semua kawasan pilihan raya di negara ini.”

[Perdana Menteri]

29. PR-1351-U(27)018

Tuan M. Kula Segaran A/L V. Murugeson [Ipoh Barat] akan mencadangkan :-

“Bahawa Dewan ini mengambil maklum penubuhan entiti persendirian yang dikenali sebagai MyEG menduakan kerja Kementerian Dalam Negeri. MyEG sebagai satu agensi di antara Kementerian Dalam negeri dan orang awam adalah tidak diperlukan, membazirkan sumber-sumber dan mengenakan fi yang tidak berpatutan kepada orang awam. Penubuhan entiti ini mempersoal integriti Kerajaan dan menggalakkan amalan korupsi.”

[Menteri Dalam Negeri]

30. PR-1351-U(27)019

Tuan Liew Chin Tong [Kluang] akan mencadangkan :-

“Bahawa Dewan ini menggesa Kerajaan untuk mengumumkan laporan penuh Jawatankuasa Siasatan Bebas mengenai kejadian kebakaran Hospital Sultanah Aminah Johor Bahru pada 25 Oktober 2016 untuk makluman dan pengetahuan rakyat tentang punca-punca berlakunya kebakaran tersebut. Kerajaan juga didesak untuk menyatakan langkah-langkah yang akan diambil untuk mencegah dan mengelakkan tragedi kebakaran berulang lagi di mana-mana hospital atau pusat perubatan.”

[Menteri Kesihatan]

31. PR-1351-U(27)020

Tuan Liew Chin Tong [Kluang] akan mencadangkan :-

“Bahawa Dewan ini menyokong cadangan menetapkan sebarang pembelian aset atau sistem pertahanan yang melebihi RM100 juta oleh Kementerian Pertahanan, mesti dibawa ke Parlimen di bahas dan diaudit oleh Jabatan Audit Negara supaya untuk syarat meneruskan pembelian ini. Ini juga bertujuan untuk mempertingkatkan integriti dan keberkesanan pembelian sistem pertahanan. Ini adalah diakibatkan oleh pembelian Kapal Selam Scorpene telah menimbulkan banyak persepsi negatif terhadap negara”.

[Perdana Menteri]

32. PR-1351-U(27)021

Tuan Liew Chin Tong [Kluang] akan mencadangkan :-

“Bahawa Dewan ini bersetuju mengurangkan peruntukan untuk JPM dan menyalurkan kepada peruntukan bagi hal ehwal pendidikan, pengangkutan awam, kesihatan dan kebajikan rakyat. Peruntukan untuk Jabatan Perdana Menteri telah dihadkan tahapnya pada tahun 2008 iaitu masing-masing sebanyak RM3.4 bilion bagi peruntukan pengurusan dan RM3.5 bilion untuk pembangunan. Ini membawa kepada jumlah keseluruhan sebanyak RM6.9 bilion. Berbanding 2017,

anggaran peruntukan pengurusan dan pembangunan telah melepasi tahap ditetapkan pada 2008 tersebut iaitu masing-masing sebanyak RM4.92 bilion dan RM11.019 bilion yang membawa kepada jumlah keseluruhan RM15.94 bilion”.

[Menteri Kewangan]

33. PR-1351-U(27)022

Tuan Hee Loy Sian [Petaling Jaya Selatan] akan mencadangkan :-

“Dewan ini mengambil maklum bahawa Bajet 2016 sebanyak RM50 juta yang diperuntukkan kepada SJK (C) tidak disalurkan pada tahun yang ditetapkan. Dewan yang mulia ini hendaklah mengambil ketetapan bahawa semua peruntukan bajet yang diluluskan di Parlimen haruslah disalurkan kepada pihak yang sewajarnya pada tahun yang berkenaan juga”.

[Menteri Kewangan]

34. PR-1351-U(27)023

Tuan Hee Loy Sian [Petaling Jaya Selatan] akan mencadangkan :-

“Dewan ini mengambil maklum bahawa banyak pengusaha teksi persendirian mahu pun berdaftar di bawah syarikat swasta menghadapi kesukaran dan ada yang terpaksa menutup operasi mereka.

Dewan ini juga mengambil maklum bahawa salah satu punca permasalahan ini adalah dengan kewujudan Uber dan GrabCar yang jauh lebih efisien daripada operasi mereka melalui penggunaan teknologi aplikasi dengan menggunakan telefon pintar. Maka dengan menyedari hakikat ini, Dewan yang mulia ini hendaklah membahaskan langkah-langkah strategik bagi menyelamatkan pengusaha teksi yang ada dalam menghadapi persaingan daripada Uber dan GrabCar ini”.

[Perdana Menteri]

35. PR-1351-U(27)024

Tuan Hee Loy Sian [Petaling Jaya Selatan] akan mencadangkan :-

“Bahawa Dewan ini menolak pembinaan jana kuasa tenaga nuklear di Malaysia yang akan memudaratkan alam sekitar sekiranya berlaku kecuai dan bencana. Dewan ini juga haruslah membuat ketetapan bahawa sekiranya ia ingin tetap diteruskan harus mendapat referendum sokongan daripada rakyat”.

[Perdana Menteri]

36. PR-1351-U(27)025

Dato' Johari Bin Abdul [Sungai Petani] akan mencadangkan :-

“Bahawa Dewan ini mengambil maklum bahawa, lebih dari 200 ribu pelajar-pelajar setiap tahun akan menduduki peperiksaan SPM. Ada yang berjaya melanjutkan pelajaran ke tahap yang lebih tinggi dan ada yang gagal. Di sinilah jurang pemikiran akan berlaku. Yang berjaya mara terus dalam pelajaran akan mendapat pendedahan yang baik dan akan menjadi warga dan anak bangsa yang berguna kepada masyarakat. Tetapi yang gagal akan teraba-raba dan menanggung risiko terbabas dari landasan yang diharapkan. Adalah dicadangkan semua pelajar lelaki lepasan SPM dimasukkan ke dalam Program Khas Khidmat Negara / National Service selama dua tahun. Enam bulan pertama dilatih dari segi fizikal dan mental serta ilmu kewarganegaraan. Selebihnya setahun setengah lagi mereka ditempatkan dalam Angkatan Tentera Malaysia atau PDRM. Sebaik sahaja mereka tamat menjalani penempatan di ATM atau PDRM mereka hendaklah digalakkan meneruskan pelajaran sama ada jurusan akademik atau vokasional mengikut kelayakan mereka. Dengan cara ini masalah remaja dapat dikurangkan walaupun tidak diselesaikan. Banyak negara-negara lain telah melaksanakan program ini dengan jayanya”.

[Menteri Pertahanan]

37. PR-1351-U(27)026

Dato' Johari Bin Abdul [Sungai Petani] akan mencadangkan :-

“Bahawa Dewan ini mengambil maklum bahawa, semangat kekitaan dan berpasukan hendaklah ditanam dalam jiwa setiap pelajar sekolah. Setiap pelajar di sekolah rendah atau menengah hendaklah diwajibkan menyertai satu pasukan beruniform dan mereka hendaklah mendapat didikan dari guru-guru yang terlatih dalam bidang-bidang tertentu yang berhubung dengan pasukan tersebut. Sehari dalam seminggu sekolah hendaklah memperuntukkan agar guru-guru dan pelajar-pelajar memakai uniform pasukan masing-masing ke sekolah. Dengan itu pelajar-pelajar akan merasa bangga dengan pasukan mereka dan ini akan membina semangat kekitaan di kalangan pelajar-pelajar dan guru-guru”.

[Menteri Pendidikan]

38. PR-1351-U(27)027

Dato' Johari Bin Abdul [Sungai Petani] akan mencadangkan :-

“Bahawa Dewan ini mengambil maklum bahawa, ramai ibu bapa mengeluh kos menghantar anak-anak ke sekolah makin meningkat mahal. Ini termasuk kos belanja makan harian anak-anak di sekolah. Oleh kerana kos juga pengusaha kantin akan menyediakan makanan yang kurang kualiti dan tidak berzat, malah ada yang membahayakan termasuk menggunakan perisa tiruan dan pemanis yang dilarang oleh Kementerian.

Satu kempen "membawa makanan dari rumah" yang melibatkan banyak Kementerian dan Jabatan hendaklah dimulakan. Jika makanan dibawa dari rumah sudah pasti ianya bersih, berzat dan jauh dari keracunan. Pelajar juga mesti digalakkan membawa air masak putih dari rumah dan dengan ini akan mengelakkan mereka dari meminum air bergas dan air manis yang merosakkan kesihatan pelajar-pelajar. Tindakan membawa makanan dari rumah bukan sahaja memastikan kesihatan terjamin juga mengurangkan kos menghantar anak-anak ke sekolah”.

[Menteri Pendidikan]

39. PR-1351-U(27)028

Dato' Johari Bin Abdul [Sungai Petani] akan mencadangkan :-

“Bahawa Dewan ini mengambil maklum bahawa, ramai kakitangan awam yang ada ilmu berniaga dan ada yang terlibat dengan perniagaan secara sampingan. Ramai yang mahu menceburkan diri dalam perniagaan secara langsung tetapi sayang akan hilang pencen jika berhenti dari perkhidmatan awam. Akhirnya mereka berada dalam dua alam dan tidak fokus kepada tugas sebenar. Adalah dicadangkan Kerajaan mengkaji semula dasar membenarkan kakitangan awam berhenti dari perkhidmatan dan mendapat pencen.

Adalah dicadangkan jika seseorang kakitangan awan telah berkhidmat selama 21 tahun mereka boleh berhenti dan mendapat pencen. Ini samalah dengan anggota Angkatan Tentera Malaysia. Jika ini boleh dilakukan kita akan melihat mereka yang terlibat dalam perniagaan datang dari mereka yang ada pengalaman dan ada networking. Di samping itu tempat yang dikosongkan oleh mereka akan diisi oleh ramai lulusan pengajian tinggi yang tidak mempunyai kerja yang tetap atau sesuai”.

[Perdana Menteri]

40. PR-1351-U(27)029

Tuan Fong Kui Lun [Bukit Bintang] akan mencadangkan :-

“Bahawa dewan mencadangkan Kerajaan supaya mempergiatkan usaha untuk menyatupadukan rakyat berbilang kaum di Malaysia yang kelihatan masih lemah dan longgar meskipun Negara telah menjadi Negara merdeka dan berdaulat sejak 60 tahun lalu supaya mereka boleh hidup dengan aman dan saling memerlukan dan memahami bagi memudahkan mereka membangunkan ekonomi Negara secara bersama dan merealisasikan Impian Malaysia”.

[Perdana Menteri]

41. PR-1351-U(27)030

Tuan Fong Kui Lun [Bukit Bintang] akan mencadangkan :-

“Bahawa dewan mencadangkan Kerajaan memulihkan pilihan raya kerajaan tempatan seluruh Negara supaya urus tadbir Kerajaan menjadi lebih cekap, akauntabiliti dan bersih dengan mengambil langkah pertama untuk membuat kajian serius dan melakukan pungutan suara antara rakyat”.

[Menteri Kesejahteraan Bandar, Perumahan Dan Kerajaan Tempatan]

42. PR-1351-U(27)031

Tuan Manivannan A/L Gowindasamy [Kapar] akan mencadangkan :-

“Bahawa Dewan ini mempertimbangkan cadangan untuk menghalang dan mengharamkan penjualan arak murahan (cheap liquor) secara mudah dan murah yang semakin berleluasa. Gejala pengambilan arak murahan ini menimbulkan pelbagai masalah sosial seperti keganasan rumah tangga dan gengsterisme serta merosakkan organ dalaman. Di samping itu, kawalan dan penyeliaan terhadap kedai-kedai menjual arak perlu dketatkan. Masa penjualan arak dan lokasi minum arak perlu dikaji. Kawasan tempat awam seperti di taman awam dan taman permainan kanak-kanak, minum arak wajib diharamkan.

Dewan ini juga wajib mempertimbangkan penubuhan Pusat Pemulihan Arak (PPA) di setiap negeri di Malaysia untuk membendung masalah minum arak yang semakin berleluasa di kalangan anak muda merentasi sempadan bangsa dan agama”.

[Menteri Kesejahteraan Bandar, Perumahan Dan Kerajaan Tempatan]

43. PR-1351-U(27)032

Tuan Manivannan A/L Gowindasamy [Kapar] akan mencadangkan :-

“Bahawa Dewan ini mempertimbangkan cadangan untuk kes kematian di bawah tahanan Polis DiRaja Malaysia, keluarga si mati diberi kebenaran sepenuhnya untuk memperoleh pakar perubatan forensik sendiri bagi mewakili pihak keluarga si mati semasa bedah siasat dijalankan”.

[Menteri Dalam Negeri]

44. PR-1351-U(27)033

Tuan Manivannan A/L Gowindasamy [Kapar] akan mencadangkan :-

“Bahawa Dewan ini mendesak agar pendidikan agama diperkenalkan di sekolah kepada pelajar bukan Islam sebagai langkah untuk menerapkan nilai-nilai murni dan keagamaan di kalangan pelajar bukan Islam bagi menangani gegala sosial yang kian meningkat dan berleluasa akibat daripada kegagalan sistem pendidikan di Malaysia”.

[Menteri Pendidikan]

45. PR-1351-U(27)034

Tuan Wong Sze Phin @ Jimmy [Kota Kinabalu] akan mencadangkan :-

“Bahawa Kerajaan Malaysia mengiktiraf Sijil Peperiksaan Bersepadu Sekolah-sekolah Menengah Persendirian Cina di Malaysia (Certificate of Unified Examination for Independent Chinese Middle Schools in Malaysia) ataupun UEC sebagai sijil peperiksaan yang setaraf dengan Sijil Tinggi Pelajaran Malaysia (STPM).

Di Sabah, ibu bapa dari kaum dan bangsa selain Cina turut menerima dan memilih sistem pendidikan Sekolah Menengah Persendirian Cina. Malahan, jumlah pelajar di Sekolah - sekolah Menengah Persendirian Cina di Sabah yang bukan dari keturunan Cina adalah antara 25% sehingga 85%.

Kerajaan Sarawak telah mengiktiraf UEC sebagai peperiksaan yang diterima oleh perkhidmatan awam Sarawak. Kerajaan pusat juga telah berkali-kali menyatakan pertimbangan dalam mengiktiraf UEC.

Lebih 100 universiti dari 12 negara seperti Australia, UK, US dan lain-lain telah mengiktiraf UEC dan diterima sebagai sijil untuk memasuki universiti dan pusat pengajian tinggi sejak lebih tiga puluh tahun yang lepas.

Di sini, saya menggesa Dewan ini mengambil ketetapan untuk meluluskan cadangan bahawa UEC diterima oleh semua universiti, pusat pengajian tinggi tempatan dan juga perkhidmatan awam di Malaysia”.

[Menteri Pendidikan]

****UCAPAN-UCAPAN**
(PERATURAN MESYUARAT 17 BAHARU)
(KAMAR KHAS)

Tarikh Ucapan	Ahli Yang Berucap	Tajuk Ucapan	Menteri Yang Bertanggungjawab
1. 28.3.2017 (Selasa)	1. YB Tuan Zairil Khir Johari (Bukit Bendera)	1. Papan Tanda Balai Polis Tanjung Tokong	1. YB Menteri Kerja Raya
2. 28.3.2017 (Selasa)	2. YB Tuan Chong Chieng Jen (Bandar Kuching)	2. Kes Melibatkan Cik Wong Wang Yuen (KP:850523-13-5550) Yang Telah Banyak Kali Memohon Untuk Menjadi Guru Di Sekolah Kerajaan Tetapi Tidak Berjaya	2. YB Menteri Pendidikan

**** Ucapan-ucapan Di Bawah Usul Berkenaan Perkara Tadbir Kerajaan (Peraturan Mesyuarat 17 Baharu)**